

通鑑紀事本末

DS


747

12

S7553Y8

1873

v. 76



August 11, 1912

通鑑紀事本末卷一百一十八

宋 趙 安 義 桓 綱 範

明 太 倉 張 湯 韓 正

北宗張獨

後梁均王乾化三年 蜀太子元曉殺賊總督日現

不立而費教知者并賜賜位猶急禁私與主命杜光

遠趙神靜有能者使侍東宮元應為蜀道許叔餘備

夫太子未嘗與之共言日與樂工輩小嬉戲無度倣

屬與敢諫使七月蜀主將以七夕出遊丙午太子召

諸王大臣宴後集王宗翰南橋密使潘南鄭亦學士

通鑑紀事本末卷二百二十八

宋建安袁樞編輯

明太倉張溥論

莊宗滅蜀

後梁均王乾化三年蜀太子元膺猥喙齟齬目視不正而警敏知書善騎射性狷急猜忍蜀主命杜光庭選純靜有德者使侍東宮光庭薦儒者許寂徐簡夫太子未嘗與之交言日與樂工羣小嬉戲無度僚屬莫敢諫秋七月蜀主將以七夕出遊丙午太子召諸王大臣宴飲集王宗翰內樞密使潘峭翰林學士

承旨高陽毛文錫不至太子怒曰集王不來必峭與文錫離間也大昌軍使徐瑤常謙素爲太子所親信酒行屢曰少保唐道襲道襲懼而起丁未旦太子入白蜀主曰潘峭毛文錫離間兄弟蜀主怒命貶逐峭文錫以前武泰節度使兼侍中潘炕爲內樞密使太子出道襲入蜀主以其事告之道襲曰太子謀作亂欲召諸將諸王以兵錮之然後舉事耳蜀主疑焉遂不出道襲請召屯營兵入宿衛許之內外戒嚴太子初不爲備聞道襲召兵乃以天武甲士自衛捕潘峭毛文錫至搃之幾死囚諸東宮又捕成都尹潘嶠囚

諸得賢門戊申徐瑤常謙與懷勝軍使嚴璘等各帥所部兵奉太子攻道襲至清風樓道襲引屯營兵出拒戰道襲中流矢逐至城西斬之殺屯營兵甚眾中外驚擾潘炕言於蜀主曰太子與唐道襲爭權耳無它志也陛下宜面諭大臣以安社稷蜀主乃召兼中書令王宗侃王宗賀前利州團練使王宗魯等使發兵討爲亂者徐瑤常謙等宗侃等陳於西毬場門兼侍中王宗黯自大安門梯城而入與瑤謙戰於會同殿前殺數千人餘眾皆潰瑤死謙與太子犇躍龍池匿於檻中及暮稍定己酉旦太子出就舟人勺食舟

人以告蜀主遣集王宗翰往慰撫之比至太子已爲衛士所殺蜀主疑宗翰殺之大慟不已左右恐事變會張格呈慰諭軍民榜讀至不行斧鉞之誅將誤社稷之計蜀主收涕曰朕何敢以私害公於是下詔廢太子元膺爲庶人宗翰奏誅手刃太子者元膺左右坐誅死者數十人貶竄者甚眾庚戌贈唐道襲太師謚忠壯復以潘峭爲樞密使冬十月蜀潘炕屢請立太子蜀主以雅王宗輅類己信王宗傑才敏欲擇一人立之鄭王宗衍最幼其母徐賢妃有寵欲立其子使飛龍使唐文展諷張格上表請立宗衍格夜以

表示功臣王宗侃等詐云受密旨眾皆署名蜀主令相者視諸子亦希旨言鄭王相最貴蜀主以爲眾人實欲立宗衍不得已許之曰宗衍幼懦能堪其任乎甲午立宗衍爲太子

四年春正月丙子蜀主命太子判六軍開崇勳府置僚屬後更謂之天策府 秋八月戊子以內樞密使潘峭爲武泰軍節度使同平章事翰林學士承旨毛文錫爲禮部尙書判樞密院

貞明三年秋七月蜀飛龍使唐文展居中用事張格附之與司徒判樞密院事毛文錫爭權文錫將以女

適左僕射兼中書侍郎同平章事庾傳素之子會親族於樞密院用樂不先表聞蜀主聞樂聲怪之文展從而譖之八月庚寅貶文錫茂州司馬其子司封員外郎詢流維州籍沒其家貶文錫弟翰林學士文晏爲榮經尉傳素罷爲工部尙書以翰林學士承旨庾凝績權判內樞密院事凝績傳素之再從弟也

四年蜀太子衍好酒色樂遊戲蜀主嘗自夾城過聞太子與諸王鬪鷄擊毬喧呼之聲歎曰吾百戰以立基業此輩其能守之乎由是惡張格而徐賢妃爲之內主竟不能去也信王宗傑有才略屢陳時政蜀主

賢之有廢立意二月癸亥宗傑暴卒蜀主深疑之蜀主自永平末得疾昏瞶至是增劇以北面行營招討使兼中書令王宗弼沈靜有謀五月召還以爲馬步都指揮使乙亥召大臣入寢殿告之曰太子仁弱朕不能違諸公之請踰次而立之若其不堪大業可寘諸別宮幸勿殺之但王氏子弟諸公擇而輔之徐妃兄弟止可優其祿位慎勿使之掌兵預政以全其宗族內飛龍使唐文展久典禁兵參預機密欲去諸大臣遣人守宮門王宗弼輩三十餘人日至朝堂不得入見文展屢以蜀主之命慰撫之伺蜀主殂卽作

難遣其黨內皇城使潘在迎偵察外事在迎以其謀告宗弼等宗弼等排闥入言文展之罪以天冊府掌書記崔延昌權判六軍事召太子入侍疾丙子貶唐文展爲眉州刺史翰林學士承旨王保晦坐附會文展削官爵流瀘州在迎炕之子也丙申蜀主詔中外財賦中書除授諸司刑獄案牘專委庾凝績都城及行營軍旅之事委宣徽南院使宋光嗣丁酉削唐文展官爵流雅州辛丑以宋光嗣爲內樞密使與兼中書令王宗弼宗瑤宗綰宗夔竝受遺詔輔政初蜀主雖因唐制置樞密使專用士人及唐文展得罪蜀主

以諸將多許州故人恐其不爲幼主用故以光嗣代之自是宦者始用事六月壬寅朔蜀主殂癸卯太子卽皇帝位尊徐賢妃爲太后徐淑妃爲太妃以宋光嗣判六軍諸衛事乙卯殺唐文展王保晦命西面招討副使王宗昱殺天雄節度使唐文裔於秦州免左保勝軍使領右街使唐道崇官蜀唐文展旣死太傅門下侍郎同平章事張格內不自安或勸格稱疾俟命禮部尙書楊玢自恐失勢謂格曰公有援立大功不足憂也庚午貶格爲茂州刺史玢爲榮經尉吏部侍郎許寂戶部侍郎潘嶠皆坐格黨貶官格尋再

貶維州司戶。秋七月壬申朔，蜀主以兼中書令王宗弼爲鉅鹿王，宗瑤爲臨淄王，宗綰爲臨洮王，宗播爲臨潁王，宗裔、宗夔及兼侍中宗黯皆爲琅邪郡王。甲戌，以王宗侃爲樂安王。丙子，以兵部尚書庾傳素爲太子少保，兼中書侍郎、同平章事。蜀主不親政，事內外遷除皆出於王宗弼。宗弼納賄多，私上下，咨怨宋光嗣、通敏、善希合。蜀主寵任之，蜀由是遂衰。蜀諸王皆領軍使，彭王宗鼎謂其昆弟曰：「親王典兵禍亂之本，今主少臣彊，讒間將興，繕甲訓士，非吾輩所宜爲也。」因固辭軍使。蜀主許之，但營書舍，植松竹。

自娛而已 乙丑蜀主以內給事王廷紹歐陽晃李
周輅宋光葆宋承蒞田魯儔等爲將軍及軍使皆干
預政事驕縱貪暴大爲蜀患周庠切諫不聽晃患所
居之隘夜因風縱火焚西鄰軍營數百間明旦召匠
廣其居蜀主亦不之問光葆光嗣之從弟也

五年蜀主奢縱無度日與太后太妃遊宴於貴臣之
家及遊近郡名山飲酒賦詩所費不可勝紀仗內教
坊使嚴旭彊取士民女子內宮中或得厚賂而免之
以是累遷至蓬州刺史太后太妃各出教令賣刺史
令錄等官每一官闕數人爭納賂賂多者得之

六年秋七月乙卯蜀主下詔北巡以禮部尙書兼成都尹長安韓昭爲文思殿大學士位在翰林承旨上昭無文學以便佞得幸出入宮禁就蜀主乞通渠巴集數州刺史賣之以營居第蜀主許之識者知蜀之將亡八月戊辰蜀主發成都被金甲冠珠帽執弓矢而行旌旗兵甲互百餘里雒令段融上言不宜遠離都邑當委大臣征討不從九月次安遠城冬十月辛酉蜀主如武定軍數日復還安遠十一月庚戌蜀主發安遠城十二月庚申至利州閬州團練使林思謬來朝請幸所治從之癸亥泛江而下龍舟畫舸

輝映江渚州縣供辦民始愁怨王申至閬州州民何
康女色美將嫁蜀主取之賜其夫家帛百匹夫一慟
而卒癸未至梓州

龍德元年春正月甲午蜀主還成都 初蜀主之爲
太子高祖爲聘兵部尙書高知言女爲妃無寵及韋
妃入宮尤見疎薄至是遣還家知言驚仆不食而卒
韋妃者徐耕之孫也有殊色蜀主適徐氏見而悅之
太后因納於後宮蜀主不欲娶於母族託云韋昭度
之孫初爲婕妤累加元妃蜀主常列錦步障擊毬其
中往往遠適而外人不知藝諸香晝夜不絕久而厭

之更焚阜莢以亂其氣結繒爲山及宮殿樓觀於其上或爲風雨所敗則更以新者易之或樂飲繒山涉旬不下山前穿渠通禁中或乘船夜歸令宮女秉蠟炬千餘居前船卻立炤之水面如晝或酣飲禁中鼓吹沸騰以至達旦以是爲常

二年春二月蜀主好爲微行酒肆倡家靡所不到惡人識之乃下令士民皆著大裁帽 夏四月蜀軍使王承綱女將嫁蜀主取之入宮承綱請之蜀主怒流於茂州女聞父得罪自殺

後唐莊宗同光元年秋八月蜀主以文思殿大學士

韓昭內皇城使潘在迎武勇軍使顧在珣爲狎客陪侍遊宴與宮女雜坐或爲豔歌相唱和或談嘲謔浪鄙俚褻慢無所不至蜀主樂之在珣彥朗之子也時樞密使宋光嗣等專斷國事恣爲威虐務徇蜀主之欲以盜其權宰相王鉚庾傳素等各保寵祿無敢規正潘在迎每勸蜀主誅諫者無使謗國嘉州司馬劉贊獻陳後主三閣圖并作歌以諷賢良方正蒲禹卿對策語極切直蜀主雖不罪亦不能用也 九月庾戌蜀主以重陽宴近臣於宣華苑酒酣嘉王宗壽乘間極言社稷將危流涕不已韓昭潘在迎曰嘉王好

酒悲因諧笑而罷

冬十月彗星見輿鬼長丈餘蜀

司天監言國有大災蜀主詔於玉局化設道場右補
闕張雲上疏以爲百姓怨氣上徹於天故彗星見此
乃國亡之徵非祈禳可弭蜀主怒流雲黎州卒於道
二年春三月己亥朔蜀主宴近臣於怡神亭酒酣君
臣及宮人皆脫冠露髻喧譁自恣知制誥京兆李龜
頑諫曰君臣沈湎不憂國政臣恐啟北敵之謀不聽
夏四月帝遣客省使李嚴使於蜀嚴盛稱帝威德
有混一天下之志且言朱氏篡竊諸侯曾無勤王之
舉王宗儔以其語侵蜀請斬之蜀主不從宣徽北院

使宋光葆上言晉王有憑陵我國家之志宜選將練兵屯戍邊鄙積糗糧治戰艦以待之蜀主乃以光葆爲梓州觀察使充武德節度畱後五月戊申蜀主遣李嚴還初帝因嚴入蜀令以馬市宮中珍玩而蜀法禁錦綺珍奇不得入中國其粗惡者乃聽入中國謂之入草物嚴還以聞帝怒曰王衍寧免爲入草之人乎嚴因言於帝曰衍童騃荒縱不親政務斥遠故老昵比小人其用事之臣王宗弼宋光嗣等諂諛專恣黷貨無厭賢愚易位刑賞紊亂君臣上下專以奢淫相尙以臣觀之大兵一臨瓦解土崩可翹足而待

也帝深以爲然

秋八月戊辰蜀主以右定遠軍使

王宗鐔爲招討馬步使帥二十一軍屯洋州乙亥以
長直馬軍使林思謬爲昭武節度使戍利州以備唐
帝復遣使者李彥稠入蜀 九月己亥至成都

蜀前山南節度使兼中書令王宗儔以蜀主失德與
王宗弼謀廢立宗弼猶豫未決庚戌宗儔憂憤而卒
宗弼謂樞密使宋光嗣景潤澄等曰宗儔教我殺爾
曹今日無患矣光嗣輩俯伏泣謝宗弼子承班聞之
謂人曰吾家難乎免矣 乙卯蜀主以前鎮江節度
使張武爲峽路應援招討使 蜀宣徽北院使王承

休請擇軍驍勇者萬二千人置駕下左右龍武步騎四十軍兵械給賜皆優異於它軍以承休爲龍武軍馬步都指揮使以裨將安重霸副之舊將無不憤恥重霸雲州人以狡佞賄賂事承休故承休悅之冬十一月蜀主遣其翰林學士歐陽彬來聘彬衡山人也又遣李彥稠東還蜀以唐脩好罷威武城戍召關宏業等二十四軍還成都戊申又罷武定武興招討劉潛等三十七軍辛酉蜀主罷天雄軍招討命王承騫等二十九軍還成都蜀主罷金州屯戍命王承勳等七軍還成都初唐僖昭之世宦官雖盛

未嘗有建節者蜀安重霸勸王承休求秦州節度使
承休言於蜀主曰秦州多美婦人請爲陛下采擇以
獻蜀主許之庚午以承休爲天雄節度使封魯國公
以龍武軍爲承休牙兵 乙亥蜀主以前武德節度
使兼中書令徐延瓊爲京城內外馬步都指揮使延
瓊以外戚代王宗弼居舊將之右眾皆不平

三年夏六月帝將伐蜀辛卯詔天下括市戰馬 秋
九月蜀主與太后太妃遊青城山歷丈人觀上清宮
遂至彭州陽平化漢州三學山而還 丁酉帝與宰
相議伐蜀威勝節度使李紹欽素諂事宣徽使李紹

宏紹宏薦紹欽有蓋世奇才雖孫吳不如可以大任
郭崇韜曰段凝亡國之將姦諂絕倫不可信也眾舉
李嗣源崇韜曰契丹方熾總管不可離河朔魏王地
當儲副未立殊功請依故事以爲伐蜀都統成其威
名帝曰兒幼豈能獨往當求其副旣而曰無以易卿
庚子以魏王繼岌充西川四面行營都統崇韜充東
北面行營都招討制置等使軍事悉以委之又以荆
南節度使高季興充東南面行營都招討使鳳翔節
度使李繼昭充都供軍轉運應接等使同州節度使
李令德充行營副招討使陝州節度使李紹琛充蕃

漢馬步軍都排陳斬斫使兼馬步軍都指揮使西京
畱守張筠充西川管內安撫應接使華州節度使毛
璋充左廂馬步都虞候邠州節度使董璋充右廂馬
步都虞候客省使李嚴充西川管內招撫使將兵六
萬伐蜀仍詔季興自取夔忠萬三州爲巡屬都統置
中軍以供奉官李從襲充中軍馬步都指揮監押高
品李廷安呂知柔充魏王牙通謁辛丑以工部尙書
任圜翰林學士李愚竝參預都統軍機 蜀安重霸
勸王承休請蜀主東遊秦州承休到官卽毀府署作
行宮大興力役強取民間女子教歌舞圖形遺韓昭

使言於蜀主又獻花木圖盛稱秦州山川土風之美
蜀主將如秦州羣臣諫者甚眾皆不聽王宗弼上表
諫蜀主投其表於地太后涕泣不食止之亦不能得
前秦州節度判官蒲禹卿上表幾二千言其略曰先
帝艱難創業欲傳之萬世陛下少長富貴荒色惑酒
秦州人雜羌胡地多瘴癘萬眾困於犇馳郡縣罷於
供億鳳翔久爲仇讎必生釁隙唐國方通歡好恐懷
疑貳先皇未嘗無故盤遊陛下率意頻離宮闕秦皇
東狩鑾駕不還煬帝南巡龍舟不返蜀都彊盛雄視
鄰邦邊亭無烽火之虞境內有腹心之疾百姓失業

盜賊公行昔李執屈於桓溫劉禪降於鄧艾山河險固不足憑恃韓昭謂禹卿曰吾收汝表俟主上西歸當使獄吏字字問汝王承休妻嚴氏美蜀主私焉故銳意欲行冬十月排陳斬斫使李紹琛與李嚴將驍騎三千步兵萬人爲前鋒招討判官陳乂至寶雞稱疾乞畱李愚厲聲曰陳乂見利則進懼難則止今大軍涉險人心易搖宜斬以徇由是軍中無敢顧望者乂薊州人也癸亥蜀主引兵數萬發成都甲子至漢州武興節度使王承捷告唐兵西上蜀主以爲羣臣同謀沮己猶不信大言曰吾方欲耀武遂東行

在道與羣臣賦詩殊不爲意 丁丑李紹琛攻蜀威
武城蜀指揮使唐景思將兵出降城使周彥禪等知
不能守亦降景思秦州人也得城中糧二十萬斛紹
琛縱其敗兵萬餘人逸去因倍道趣鳳州李嚴飛書
以諭王承捷李繼曦竭鳳翔蓄積以饋軍不能充人
情憂恐郭崇韜入散關指其山曰吾輩進無成功不
復得還此矣當盡力一決今饋運將竭宜先取鳳州
因其糧諸將皆言蜀地險固未可長驅宜按兵觀釁
崇韜以問李愚愚曰蜀人苦其主荒淫莫爲之用宜
乘其人情崩離風驅霆擊彼皆破膽雖有險阻誰與

守之兵執不可緩也是日李紹琛告捷崇韜喜謂愚
曰公料敵如此吾復何憂乃倍道而進戊寅王承捷
以鳳興文扶四州印節迎降得兵八千糧四十萬斛
崇韜曰平蜀必矣卽以都統牒命承捷攝武興節度
使己卯蜀主至利州威武敗卒犇還始信唐兵之來
王宗弼宋光嗣言於蜀主曰東川山南兵力尙完陛
下但以大軍扼利州唐人安敢懸兵深入從之庚辰
以隨駕清道指揮使王宗勳王宗儼兼侍中王宗昱
爲三招討將兵三萬逆戰從駕兵自綿漢至深渡千
里相屬皆怨憤曰龍武軍糧餉倍於它軍它軍安能

禦敵李紹琛等過長舉興州都指揮使程奉璉將所部兵五百來降且請先治橋棧以俟唐軍由是軍行無險阻之虞辛巳興州刺史王承鑒棄城走紹琛等克興州郭崇韜以唐景思攝興州刺史乙酉成州刺史王承朴棄城走李紹琛等與蜀三招討戰於三泉蜀兵大敗斬首五千級餘眾潰走又得糧十五萬斛於三泉由是軍食優足蜀主聞王宗勳等敗自利州倍道西走斷桔柏津浮梁命中書令判六軍諸衛事王宗弼將大軍守利州且令斬王宗勳等三招討李紹琛晝夜兼行趨利州蜀武德畱後宋光葆遣郭

崇韜書請唐兵不入境當舉巡屬內附苟不如約則背城決戰以報本朝崇韜復書撫納之己丑魏王繼岌至興州光葆以梓綿劍龍普五州武定節度使王承肇以洋蓬壁三州山南節度使兼侍中王宗威以梁開通渠麟五州階州刺史王崇岳以階州皆降承肇宗侃之子也自餘城鎮皆望風款附天雄節度使王承休與副使安重霸謀掩擊唐軍重霸曰擊之不勝則大事去矣蜀中精兵十萬天下險固唐兵雖勇安能直渡劍門邪然公受國恩聞難不可不赴願與公俱西承休素親信之以爲然重霸請賂羌人買文

扶州路以歸承休從之使重霸將龍武軍及所募兵
萬二千人以從將行州人餞於城外承休上道重霸
拜於馬前曰國家竭力以得秦隴若從開府還朝誰
當守之開府行矣重霸請爲公畱守承休業已上道
無如之何遂與招討副使王宗泐自文扶而南其地
皆不毛羌人抄之且戰且行士卒凍餒比至茂州餘
衆二千而已重霸遂以秦隴來降 郭崇韜遣王宗
弼等書爲陳利害李紹琛未至利州宗弼棄城引兵
西歸王宗勳等三招討追及宗弼於白芳宗弼懷中
探詔書示之曰宋光嗣令我殺爾曹因相持而泣遂

合謀送款於唐 十一月丙申蜀主至成都百官及後宮迎於七里亭蜀主入妃嬪中作回鶻隊入宮丁酉出見羣臣於文明殿泣下霑襟君臣相視竟無一言以救國患戊戌李紹琛至利州修桔柏浮梁昭武節度使林思謬先棄城奔閬州遣使請降甲辰魏王繼岌至劍州蜀武信節度使兼中書令王宗壽以遂合渝瀘昌五州降王宗弼至成都登太立門嚴兵自衛蜀主及太后自往勞之宗弼驕慢無復臣禮乙巳劫遷蜀主及太后後宮諸王於西宮收其璽綬使親吏於義興門邀取內庫金帛悉歸其家其子承涓杖

劍入宮取蜀主寵姬數人以歸丙午宗弼自稱權西
川兵馬畱後李紹琛進至綿州倉庫民居已爲蜀兵
所燔又斷綿江浮梁水深無舟楫可渡紹琛謂李嚴
曰吾懸軍深入利在速戰乘蜀人破膽之時但得百
騎過鹿頭關彼且迎降不暇若俟修繕橋梁必畱數
日或教王衍堅閉近關折吾兵勢儻延旬浹則勝負
未可知矣乃與嚴乘馬浮度江從兵得濟者僅千人
溺死者亦千餘人遂入鹿頭關丁未進據漢州居三
日後軍始至王宗弼遣使以幣馬牛酒勞軍且以蜀
主書遺李嚴曰公來吾卽降或謂嚴曰公首建伐蜀

之策蜀人怨公深入骨髓不可往嚴不從欣然馳入成都撫諭吏民告以大軍繼至蜀君臣後宮皆慟哭蜀主引嚴見太后以母妻爲託宗弼猶乘城爲守備嚴悉命撤去樓櫓己酉魏王繼岌至綿州蜀主命翰林學士李昊草降表又命中書侍郎同平章事王鎔草降書遣兵部侍郎歐陽彬奉之以迎繼岌及郭崇韜王宗弼稱蜀君臣久欲歸命而內樞密使宋光嗣景潤澄宣徽使李周輅歐陽晃熒惑蜀主皆斬之函首送繼岌又責文思殿大學士禮部尙書成都尹韓昭佞諛梟於金馬坊門內外馬步都指揮使兼中書

令徐延瓊果州團練使潘在迎嘉州刺史顧在珣及諸貴戚皆惶恐傾其家金帛伎妾以賂宗弼僅得免死凡素所不快者宗弼皆殺之辛亥繼岌至德陽宗弼遣使奉牋稱已遷蜀主於西第安撫軍城以俟王師又使其子承班以蜀主後宮及珍玩賂繼岌及郭崇韜求西川節度使繼岌曰此皆我家物奚以獻爲畱其物而遣之李紹琛畱漢州八日以俟都統甲寅繼岌至漢州王宗弼迎謁乙卯至成都丙辰李嚴引蜀主及百官儀衛出降於升遷橋蜀主白衣銜璧牽羊草繩縈首百官衰絰徒跣輿櫬號哭俟命繼岌受

璧崇韜解縛焚櫬承制釋罪君臣東北向拜謝丁巳
大軍入成都崇韜禁軍士侵掠市不改肆自出師至
克蜀凡七十日得節度十州六十四縣二百四十九
兵三萬鎧仗錢糧金銀繒錦共以千萬計高季興聞
蜀亡方食失匕箸曰是老夫之過也梁震曰不足憂
也唐主得蜀益驕亡無日矣安知其不爲吾福楚王
殷聞蜀亡上表稱臣已營衡麓之間爲菟裘之地願
上印綬以保餘齡上優詔慰諭之十二月癸酉王
承休王宗泐至成都魏王繼岌詰之曰居大鎮擁彊
兵何以不拒戰對曰畏大王神武曰然則何不降對

曰王師不入境曰所俱入羌者幾人對曰萬二千人
曰今歸者幾人對曰二千人曰可以償萬人之死矣
皆斬之并其子 閏十二月丁酉詔蜀朝所署官四
品以上降授有差五品以下才地無取者悉縱歸田
里其先降及有功者委崇韜隨事獎任又賜王衍詔
略曰固當裂土而封必不薄人於險三辰在上一言
不欺

明宗天成元年春正月庚申魏王繼岌遣李繼曠李
嚴部送王衍及其宗族百官數千人詣洛陽 二月
乙巳王衍至長安有詔止之 三月伶人景進等言

於帝曰魏王未至康延孝初平西南猶未安王衍族黨不少聞車駕東征恐其爲變不若除之帝乃遣中使向延嗣齎勅往誅之勅曰王衍一行竝從殺戮已印畫樞密使張居翰覆視就殿柱揩去衍字改爲家字由是蜀百官及衍僕役獲免者千餘人延嗣至長安盡殺衍宗族於秦川驛衍母徐氏且死呼曰吾兒以一國迎降不免族誅信義俱棄吾知汝行亦受禍矣夏六月蜀百官至洛陽永平節度使兼侍中馬全曰國亡至此生不如死不食而卒以平章事王鎔等爲諸州府刺史少尹判官司馬亦有復歸蜀者

三年夏六月陝州行軍司馬王宗壽表請葬故蜀主王衍秋七月乙巳贈衍順正公以諸侯禮葬之

張溥曰蜀太子元膺之死鄭王宗衍之立皆非建意也唐襲以舞僮得幸元膺易之數相構誣七夕之宴王宗翰不至元膺遷怒於潘峭毛文錫請賜貶斥襲卽告其爲亂召兵入衛倉徨疑鬪並見殺傷襲中流矢墜馬死元膺匿躍龍池檻中亦爲衛兵所殺旣議立儲建心屬宗輅宗傑徐賢妃結宦者唐文展教相士言宗衍相貴又諷張格贊成之遂立爲太子夫元膺告變建

遣宗翰慰撫急望生全衍雖以母寵得立建嘗
憂其幼懦弗克勝任慈父之愛知子之明於人
情無大相遠且釁非巫蠱而啟子弄父兵之禍
女異驪戎而開廢長立少之疑建亦心知其非
不能自斷豈老夫耄焉慮鮮及世哉衍方頤大
口垂手過膝顧目見耳以皮相之誠善於元膺
之猥喙齟齬然朝盈狎客國效醉妝母妃鬻官
寺人出鎮太史奏貪狼之風君臣迷甘州之曲
般樂待亡何以延久唐郭崇韜李紹琛輔魏王
繼岌入討自出師至克蜀凡七十日自古國家

覆亡未有若是速者衍與櫬出降僅冀免死莊
宗聽景進言竟負信三辰湛彼一族殺降不仁
禍不旋踵然身爲臣虜死生在秦川悲怨又
誰咎哉王宗弼王宗壽皆建養子宗弼受詔輔
政賣國劫君宗壽諫衍荒飲守義不降蜀亡之
後收王氏十八喪葬之長安南三趙村忠臣板
蕩於家人見之然宗弼輸款所求惟西川節度
反爲崇韜所誅宗壽亡入熊耳山唐明宗義而
官之爲叛首者果何益乎徐賢妃臨刑叫呼劉
氏死不受辱衍上愧其母下愧其妾斯時亦哀

已爲陳長城公而所遭不若也

通鑑紀事本末卷二百二十八

通鑑紀事本末卷二百二十九

宋建安袁樞編輯

明太倉張溥論正

鄴都之變

李紹琛之叛附

後唐莊宗同光元年冬十月帝遣使以滅梁告吳蜀
二國皆懼吳揚州司馬嚴可求笑曰聞唐主始得中
原志氣驕滿御下無法不出數年將有內變吾但當
卑辭厚禮保境安民以待之耳滑州畱後李紹欽
因伶人景進納貨於宮掖除泰寧節度使帝幼善音
律故伶人多有寵常侍左右帝或時自傅粉墨與優

人共戲於庭以悅劉夫人優名謂之李天下嘗因爲
優自呼曰李天下李天下優人敬新磨遽前批其頰
帝失色羣優亦駭愕新磨徐曰理天下者只有一人
尙誰呼邪帝悅厚賜之諸伶出入宮掖侮弄搢紳羣
臣憤嫉莫敢出氣亦有反相附託以希恩澤者四方
藩鎮爭以貨賂結之其尤蠹政害人者景進爲之首
進好采閭閻鄙細事聞於上上亦欲知外間事遂委
進以耳目進每奏事常屏左右問之由是進得施其
讒慝干豫政事自將相大臣皆憚之荆南節度使
高季興在洛陽帝左右伶官求貨無厭季興忿之歸

謂將佐曰新朝百戰方得河南乃對功臣舉手云吾
於十指上得天下矜伐如此則它人無功矣其誰不
解體又荒於禽色何能長久吾無憂矣
二年春正月勅內官不應居外應前朝內官及諸道
監軍并私家先所畜者不以貴賤並遣詣闕時在上
左右者已五百人至是殆及千人皆給贍優厚委之
事任以爲腹心內諸司使自天祐以來以士人代之
至是復用宦者浸干政事旣而復置諸道監軍節度
使出征或畱闕下軍府之政皆監軍決之凌忽主帥
怙勢爭權由是藩鎮皆憤怒
二月己巳朔上祀南

郊大赦租庸副使孔謙欲聚斂以求媚凡赦文所蠲者謙復徵之自是每有詔令人皆不信百姓愁怨郭崇韜初至汴洛頗受藩鎮饋遺所親或諫之崇韜曰吾位兼將相祿賜巨萬豈藉外財但以僞梁之季賄賂成風今河南藩鎮皆梁之舊臣主上之仇讎也若拒其意能無懼乎吾特爲國家藏之私室耳及將祀南郊崇韜首獻勞軍錢十萬緡先是宦官勸帝分天下財賦爲內外府州縣上供者入外府充經費方鎮貢獻者入內府充宴遊及給賜左右於是外府常虛竭無餘而內府山積及有司辦郊祀乏勞軍錢崇韜

言於上曰臣已傾家所有以助大禮願陛下亦出內
府之財以賜有司上默然久之曰吾晉陽自有儲積
可令租庸輦取以相助於是取李繼韜私第金帛數
十萬以益之軍士皆不滿望始怨恨有離心矣郭
崇韜位兼將相復領節旄以天下爲己任權侔人主
旦夕車馬填門性剛急遇事輒發嬖倖僥求多所摧
抑宦官疾之朝夕短之於上崇韜扼腕欲制之不能
豆盧革韋說嘗問之曰汾陽王本太原人徙華陰公
世家鴈門豈其枝派邪崇韜因曰遭亂亡失譜牒嘗
聞先人言上距汾陽四世耳革曰然則固從祖也崇

韜由是以膏粱自處多甄別流品引拔浮華鄙棄勳
舊有求官者崇韜曰深知公功能然門地寒素不敢
相用恐爲名流所嗤由是嬖倖疾之於內勳舊怨之
於外崇韜屢請以樞密使讓李紹宏上不許又請分
樞密院事歸內諸司以輕其權而宦官謗之不已崇
韜鬱鬱不得志與所親謀赴本鎮以避之其人曰不
可蛟龍失水螻蟻足以制之先是上欲以劉夫人爲
皇后而有正妃韓夫人在太后素惡劉夫人崇韜亦
屢諫上以是不果於是所親說崇韜曰公若請立劉
夫人爲皇后上必喜內有皇后之助則伶官輩不能

爲患矣崇韜從之與宰相帥百官共奏劉夫人宜正位中宮癸未立魏國夫人劉氏爲皇后皇后生於寒微旣貴專務蓄財其在魏州至於薪蘇果茹皆販鬻之及爲后四方貢獻皆分爲二一上天子一上中宮以是寶貨山積惟用寫佛經施尼師而已是時皇太后誥皇后教與制勅交行於藩鎮奉之如一勳臣畏伶官之讒皆不自安蕃漢內外馬步副總管李嗣源求解兵柄帝不許夏四月孔謙貸民錢使以賤估償絲屨檄州縣督之翰林學士承旨權知汴州盧質上言梁趙巖爲租庸使舉貸誅斂結怨於人今陛

下革故鼎新爲人除害而有司未改其所爲是趙巖
復生也今春霜害桑繭絲甚薄但輸正稅猶懼流移
況益以稱貸人何以堪臣惟事天子不事租庸勅旨
未頒省牒頻下願早降明命帝不報 初胡柳之役
伶人周匝爲梁所得帝每思之入汴之日匝謁見於
馬前帝甚喜匝涕泣言曰臣所以得生全者皆梁教
坊使陳俊內園栽接使儲德源之力也願就陛下乞
二州以報之帝許之郭崇韜諫曰陛下所與共取天
下者皆英豪忠勇之士今大功始就封賞未及一人
而先以伶人爲刺史恐失天下心以是不行踰年伶

人屢以爲言帝謂崇韜曰吾已許周匝矣使吾慙見
此三人公言雖正然當爲我屈意行之五月壬寅以
俊爲景州刺史德源爲憲州刺史時親軍有從帝百
戰未得刺史者莫不憤歎 乙巳右諫議大夫薛昭
文上疏以爲今諸道僭竊者尙多征伐之謀未可遽
息又士卒久從征伐賞給未豐貧乏者多宜以四方
貢獻及南郊羨餘更加頒賚又河南諸軍皆梁之精
銳恐僭竊之國潛以厚利誘之宜加收撫又戶口流
亡者宜寬徭薄賦以安集之又土木不急之役宜加
裁省又請擇隙地牧馬勿使踐京畿民田皆不從

六月壬辰以天平節度使李嗣源爲宣武節度使
秋八月癸酉以副使衛尉卿孔謙爲租庸使右威衛
大將軍孔循爲副使循卽趙殷衡也梁亡復其姓名
謙自是得行其志重斂急徵以充帝欲民不聊生癸
未賜謙號豐財贍國功臣

三年初李嗣源北征過興唐東京庫有供御細鎧嗣
源牒副畱守張憲取五百領憲以軍興不暇奏而給
之帝怒曰憲不奉詔擅以吾鎧給嗣源何意也罰憲
俸一月令自往軍中取之帝以義武節度使王都將
入朝欲闢毬場憲曰比以行宮闕廷爲毬場前年陛

下卽位於此其壇不可毀請闢毬場於宮西數日未
成帝命毀卽位壇憲謂郭崇韜曰此壇主上所以禮
上帝始受命之地也若之何毀之崇韜從容言於帝
帝立命兩虞候毀之憲私於崇韜曰忘天背本不祥
莫大焉春二月庚辰徙李嗣源爲成德節度使

帝性剛好勝不欲權在臣下入洛之後信伶官之讒
頗疎忌宿將李嗣源家在太原三月丁酉表衛州刺
史李從珂爲北京內牙馬步都指揮使以便其家帝
怒曰嗣源握兵權居大鎮軍政在手安得爲其子奏
請乃黜從珂爲突騎指揮使帥數百人戍石門鎮嗣

源憂恐上章申理久之方解辛丑嗣源乞至東京朝覲不許郭崇韜以嗣源功高位重亦忌之私謂人曰總管令公非久爲人下者皇家子弟皆不及也密勸帝召之宿衛罷其兵權又勸帝除之帝皆不從洛陽宮殿宏邃宦者欲上增廣嬪御詐言宮中夜見鬼物上欲使符咒者禳之宦者曰臣昔逮事咸通乾符天子當是時六宮貴賤不減萬人今掖庭大半空虛故鬼物遊之耳上乃命宦者王允平伶人景進采擇民間女子遠至太原幽鎮以充後庭不啻三千人不知所從來上還自興唐載以牛車纍纍盈路張憲奏

諸營婦女亡逸者千餘人慮扈從諸軍挾匿以行其實皆入宮矣庚辰帝至洛陽辛酉詔復以洛陽爲東都興唐府爲鄴都夏六月帝苦溽暑於禁中擇高涼之所皆不稱旨宦者因言臣見長安盛時大明興慶宮樓觀以百數今日官家曾無避暑之所宮殿之盛曾不及當時公卿第舍耳帝乃命宮苑使王允平別建一樓以清暑宦者曰郭崇韜常不伸眉爲孔謙論用度不足恐陛下雖欲營繕終不可得帝曰吾自用內府錢無關經費然猶慮崇韜諫遣中使語之曰今歲盛暑異常朕昔在河上與梁人相拒行營卑

涇被甲乘馬親當矢石猶無此暑今居深宮之中而暑不可度奈何對曰陛下昔在河上勅敵未滅深念讎恥雖有盛暑不介聖懷今外患已除海內賓服故雖珍臺閑館猶覺鬱蒸也陛下儻不忘艱難之時則暑氣自消矣帝默然宦者曰崇韜之第無異皇居宜其不知至尊之熱也帝卒命允平營樓日役萬人所費巨萬崇韜諫曰今兩河水旱軍食不充願且息役以俟豐年帝不聽 秋七月甲午成德節度使李嗣源表求入朝帝不許 九月乙未立皇子繼岌爲魏王 丁酉帝與宰相議伐蜀以魏王繼岌充西川四

面行營都統郭崇韜充東北面行營都招討制置等
使軍事悉以委之 郭崇韜以北都畱守孟知祥有

薦引舊恩將行言於上曰孟知祥信厚有謀若得西
川而求帥無踰此人者又薦鄴都副畱守張憲謹重
有識可爲相戊申大軍西行 冬十一月乙卯大軍

至成都蜀主出降

事見莊
宗滅蜀

平蜀之功李紹琛爲多

位在董璋上而璋素與郭崇韜善崇韜數召璋與議
軍事紹琛心不平謂璋曰吾有平蜀之功公等樸櫟
相從反咕囁於郭公之門謀相傾害吾爲都將獨不
能以軍法斬公邪璋訴於崇韜十二月崇韜表璋爲

東川節度使解其軍職紹琛愈怒曰吾冒白刃臨險阻定兩川璋乃坐有之邪乃見崇韜言東川重地任尙書有文武才宜表爲帥崇韜怒曰紹琛反邪何敢違吾節度紹琛懼而退初帝遣宦者李從襲等從魏王繼岌伐蜀繼岌雖爲都統軍中制置補署一出郭崇韜崇韜終日決事將吏賓客趨走盈庭而都統府惟大將晨謁外牙門索然從襲等固恥之及破蜀蜀之貴臣大將爭以寶貨伎樂遺崇韜及其子廷誨魏王所得不過匹馬束帛唾壺塵柄而已從襲等益不平王宗弼之自爲西川畱後也賂崇韜求爲節度使

崇韜陽許之旣而久未得乃帥蜀人列狀見繼岌請
畱崇韜鎮蜀從襲等因謂繼岌曰郭公父子專橫今
又使蜀人請己爲帥其志難測王不可不爲之備繼
岌謂崇韜曰主上倚侍中如山嶽不可離廟堂豈肯
棄元老於蠻夷之域乎且此非余之所敢知也請諸
人詣闕自陳由是繼岌與崇韜互相疑貳丙子以知
北都畱守事孟知祥爲西川節度使同平章事促召
赴洛陽帝議選北都畱守樞密承旨段徊等惡鄴都
畱守張憲不欲其在朝廷皆曰北都非張憲不可憲
雖有宰相器今國家新得中原宰相在天子目前事

有得失可以改更比之北都獨繫一方安危不爲重也乃徙憲爲太原尹知北都畱守事以戶部尙書王正言爲興唐尹知鄴都畱守事正言昏耄帝以武德使史彥瓊爲鄴都監軍彥瓊本伶人也有寵於帝魏博等六州軍旅金穀之政皆決於彥瓊威福自恣陵忽將佐自正言以下皆諂事之初帝得魏州銀槍效節都近八千人以爲親軍皆勇悍無敵夾河之戰實賴其用屢立殊功嘗許以滅梁之日大加賞賚旣而河南平雖賞賚非一而士卒恃功驕恣無厭更成怨望是歲大饑民多流亡租賦不充道路塗潦漕輦

艱澀東都倉廩空竭無以給軍士租庸使孔謙日於上東門外望諸州漕運至者隨以給之軍士乏食有雇妻鬻子者老弱采蔬於野百十爲羣往往餒死流言怨嗟而帝遊畋不息己卯獵於白沙皇后皇子後宮畢從庚辰宿伊闕辛巳宿潭泊壬午宿龕澗癸未還宮時大雪吏卒有僵仆於道路者伊汝間饑尤甚衛兵所過責其供餉不得則壞其什器撤其室廬以爲薪甚於寇盜縣吏皆竄匿山谷帝以軍儲不足謀於羣臣豆盧革以下皆莫知爲計吏部尙書李琪上疏以爲古者量入以爲出計農而發兵故雖有水

旱之災而無匱乏之憂近代稅農以養兵未有農富給而兵不足農捐瘠而兵豐飽者也今縱未能蠲省租稅苟除折納紐配之法農亦可以小休矣帝卽勅有司如琪所言然竟不能行 郭崇韜素疾宦者嘗

密謂魏王繼岌曰大王它日得天下扇馬亦不可乘況任宦者宜盡去之專用士人呂知柔竊聽聞之由是宦官皆切齒時成都雖下而蜀中盜賊羣起布滿山林崇韜恐大軍旣去更爲後患命任圜張筠分道招討以是淹畱未還帝遣宦者向延嗣促之崇韜不出郊迎及見禮節又倨延嗣怒李從襲謂延嗣曰魏

王太子也主上萬福而郭公專權如是郭廷誨擁徒
出入日與軍中驍將蜀土豪傑狎飲指天畫地近聞
白其父請表己爲蜀帥又言蜀地富饒大人宜善自
爲謀今諸軍將校皆郭氏之黨王寄身於虎狼之口
一朝有變吾屬不知委骨何地矣因相向垂涕延嗣
歸具以語劉后后泣訴於帝請早救繼岌之死前此
帝聞蜀人請崇韜爲帥已不平至是聞延嗣之言不
能無疑帝閱蜀府庫之籍曰人言蜀中珍貨無算何
如是之微也延嗣曰臣聞蜀破其珍貨皆入於崇韜
父子崇韜有金萬兩銀四十萬兩錢百萬緡名馬千

匹它物稱是廷誨所取復在其外故縣官所得不多耳帝遂怒形於色及孟知祥將行帝語之曰聞郭崇韜有異志卿到爲朕誅之知祥曰崇韜國之勳舊不宜有此俟臣至蜀察之苟無它志則遣還帝許之王子知祥發洛陽帝尋復遣衣甲庫使馬彥珪馳詣成都觀崇韜去就如奉詔班師則已若有遷延跋扈之狀則與繼岌圖之彥珪見皇后說之曰臣見向延嗣言蜀中事勢憂在朝夕今主上當斷不斷夫成敗之機間不容髮安能緩急稟命於三千里外乎皇后復言於帝帝曰傳聞之言未知虛實豈可遽爾果決皇

后不得請退自爲教與繼岌令殺崇韜知祥行至石
壕彥珪夜叩門宣詔促知祥赴鎮知祥竊歎曰亂將
作矣乃晝夜兼行

明宗天成元年河中節度使李繼麟恃與帝故舊且
有功帝待之厚苦諸伶宦求勾無厭遂拒不與大軍
之征蜀也繼麟閱兵遣其子令德將之以從景進與
宦官譖之曰繼麟聞大軍起以爲討己故驚懼閱兵
自衛又曰崇韜所以敢倔彊於蜀者與河中陰謀內
外相應故也繼麟聞之懼欲身入朝以自明其所親
止之繼麟曰郭侍中功高於我今事勢將危吾得見

主上面陳至誠則讒人獲罪矣正月癸亥繼麟入朝
魏王繼岌將發成都令任圜權知畱事以俟孟知
祥諸軍部署已定是日馬彥珪至以皇后教示繼岌
繼岌曰大軍垂發彼無釁端安可爲此負心事公輩
勿復言且主上無勅獨以皇后教殺招討使可乎李
從襲等泣曰既有此迹萬一崇韜聞之中途爲變益
不可救矣相與巧陳利害繼岌不得已從之甲子旦
從襲以繼岌之命召崇韜計事繼岌登樓避之崇韜
方升階繼岌從者李環撾碎其首并殺其子廷誨廷
信外人猶未之知都統推官饒陽李崧謂繼岌曰今

行軍三千里外初無勅旨擅殺大將大王奈何行此危事獨不能忍之至洛陽邪繼岌曰公言是也悔之無及崧乃召書吏數人登樓去梯矯爲勅書用蠟印宣之軍中粗定崇韜左右皆竄匿獨掌書記洛陽張礪詣魏王府慟哭久之繼岌命任圜代崇韜總軍政馬彥珪還洛陽乃下詔暴郭崇韜之罪并殺其子廷說廷讓廷議於是朝野駭愕羣議紛然帝使宦官潛察之保大節度使睦王存乂崇韜之壻也宦官欲盡去崇韜之黨言存乂對諸將攘臂垂泣爲崇韜稱冤言辭怨望庚辰幽存乂於第尋殺之景進言河中

人有告變言李繼麟與郭崇韜謀反崇韜死又與存
父連謀宦官因共勸帝速除之帝乃徙繼麟爲義成
節度使是夜遣蕃漢馬步使朱守殷以兵圍其第驅
繼麟出徽安門外殺之復其姓名曰朱友謙友謙二
子令德爲武信節度使令錫爲忠武節度使詔魏王
繼岌誅令德於遂州鄭州刺史王思同誅令錫於許
州河陽節度使李紹奇誅其家人於河中紹奇至其
家友謙妻張氏帥家人二百餘口見紹奇曰朱氏宗
族當死願無濫及平人乃別其婢僕百人以其族百
口就刑張氏又取鐵券以示紹奇曰此皇帝去年所

賜也我婦人不識書不知其何等語也紹奇亦爲之
慙友謙舊將史武等七人時爲刺史皆坐族誅時洛
中諸軍飢窘妄爲謠言伶官采之以聞於帝故郭崇
韜朱友謙皆及於禍成德節度使兼中書令李嗣源
亦爲謠言所屬帝遣朱守殷察之守殷私謂嗣源曰
令公勲業振主宜自圖歸藩以遠禍嗣源曰吾心不
負天地禍福之來無所可避皆委之於命耳時伶官
用事勳舊人不自保嗣源危殆者數四賴宣徽使李
紹宏左右營護以是得全魏王繼岌畱馬步都指
揮使陳畱李仁罕馬軍都指揮使東光潘仁嗣左廂

都指揮使趙廷隱右廂都指揮使浚儀張業牙內指揮使文水武漳驍銳指揮使平恩李延厚戍成都甲申繼岌發成都命李紹琛帥萬二千人爲後軍行止常差中軍一舍 二月魏博指揮使楊仁晟將所部兵戍瓦橋踰年代歸至貝州以鄴都空虛恐兵至爲變勅畱屯貝州時天下莫知郭崇韜之罪民間訛言云崇韜殺繼岌自王於蜀故族其家朱友謙子建徽爲澶州刺史帝密勅鄴都監軍史彥瓊殺之門者白畱守王正言曰史武德夜半馳馬出城不言何往又訛言云皇后以繼岌之死歸咎於帝已弑帝矣故急

召彥瓊計事人情愈駭楊仁晟部兵皇甫暉與其徒
夜博不勝因人情不安遂作亂劫仁晟曰主上所以
有天下者吾魏軍力也魏軍甲不去體馬不解鞍者
十餘年今天下已定天子不念舊勞更加猜忌遠戍
踰年方喜代歸去家咫尺不使相見今聞皇后弑逆
京師已亂將士願與公俱歸仍表聞朝廷若天子萬
福興兵致討以吾魏博兵力足以拒之安知不更爲
富貴之資乎仁晟不從暉殺之又劫小校不從又殺
之效節指揮使趙在禮聞亂衣不及帶踰垣而走暉
追及曳其足而下之示以二首在禮懼而從之亂兵

遂奉以爲帥焚掠貝州暉魏州人在禮涿州人也詰旦暉等擁在禮南趣臨清永濟館陶所過剽掠壬辰晚有自貝州來告軍亂將犯鄴都者都巡檢使孫鐸等亟詣史彥瓊請授甲乘城爲備彥瓊疑鐸等有異志曰告者云今日賊至臨清計程須六日晚方至爲備未晚孫鐸曰賊旣作亂必乘吾未備晝夜倍道安肯計程而行請僕射帥眾乘城鐸募勁兵千人伏於王莽河逆擊之賊旣勢挫必當離散然後可撲滅也必俟其至城下萬一有姦人爲內應則事危矣彥瓊曰但嚴兵守城何必逆戰是夜賊前鋒攻北門弓弩

亂發時彥瓊將部兵宿北門樓聞賊呼聲卽時驚潰
彥瓊單騎犇洛陽癸巳賊入鄴都孫鐸等拒戰不勝
亡去趙在禮據宮城署皇甫暉及軍校趙進爲馬步
都指揮使縱兵大掠進定州人也王正言方據桉召
吏草奏無至者正言怒其家人曰賊已入城殺掠於
市吏皆逃散公尙誰呼正言驚曰吾初不知也又索
馬不能得乃帥僚佐步出府門謁在禮再拜請罪在
禮亦拜曰士卒思歸耳尙書重德勿自卑屈慰諭遣
之眾推在禮爲魏博畱後具奏其狀北京畱守張憲
家在鄴都在禮厚撫之遣使以書誘憲憲不發封斬

其使以聞 丙申史彥瓊至洛陽帝問可爲大將者
於樞密使李紹宏紹宏復請用李紹欽帝許之令條
上方略紹欽所請偏裨皆梁舊將已所善者帝疑之
而止皇后曰此小事不足煩大將紹榮可辦也帝乃
命歸德節度使李紹榮將騎三千詣鄴都招撫亦徵
諸道兵備其不服 郭崇韜之死也李紹琛謂董璋
曰公復欲貼囁誰門乎璋懼謝罪魏王繼岌軍還至
武連遇勅使諭以朱友謙已伏誅令董璋將兵之遂
州誅朱令德時紹琛將後軍在魏城聞之以帝不委
已殺令德而委璋大驚俄而璋過紹琛軍不謁紹琛

怒乘酒謂諸將曰國家南取大梁西定巴蜀皆郭公之謀而吾之戰功也至於去逆助順與國家犄角以破梁則朱公也今朱郭皆無罪族滅歸朝之後行及我矣冤哉天乎奈何紹琛所將多河中兵河中將焦武等號哭於軍門曰西平王何罪闔門屠膾我輩歸則與史武等同誅決不復東矣是日魏王繼岌至泥溪紹琛至劍州遣人白繼岌云河中將士號哭不止欲爲亂丁酉紹琛自劍州擁兵西還自稱西川節度三川制置等使移檄成都稱奉詔代孟知祥招諭蜀人三日間眾至五萬己亥魏王繼岌至利州李紹

琛遣人斷桔柏津繼岌聞之以任圜爲副招討使將步騎七千與都指揮使梁漢鵬監軍李延安追討之
庚子邢州左右步直兵趙太等四百人據城自稱安國畱後詔東北面招討副使李紹眞討之 辛丑任圜先令別將何建崇擊劍門關下之 李紹榮至鄴都攻其南門遣人以詔勅諭之趙在禮以羊酒犒師拜於城上曰將士思家擅歸相公誠善爲敷奏得免於死敢不自新遂以勅徧諭軍士史彥瓊戟手大罵曰羣死賊城破萬段皇甫暉謂眾曰觀史武德之言上不赦我矣因聚譟掠勅書手壞之守陴拒戰紹

榮攻之不利以狀聞帝怒曰克城之日勿遺噍類大發諸軍討之王寅紹榮退屯澶州甲辰夜從馬直軍士王溫等五人殺軍使謀作亂擒斬之從馬直指揮使郭從謙本優人也優名郭門高帝與梁相拒於得勝募勇士挑戰從謙應募俘斬而還由是益有寵帝選諸軍驍勇者爲親軍分置四指揮號從馬直從謙自軍使積功至指揮使郭崇韜方用事從謙以叔父事之睦王存乂以從謙爲假子及崇韜存乂得罪從謙數以私財饗從馬直諸校對之流涕言崇韜之冤及王溫作亂帝戲之曰汝旣負我附崇韜存乂又

教王溫反欲何爲也從謙益懼旣退陰與諸校曰主上以王溫之故俟鄴都平定盡阮若曹家之所有宜盡市酒肉勿爲久計也由是親軍皆不自安 丁未李紹榮以諸道兵再攻鄴都庚戌裨將楊重霸帥眾數百登城後無繼者重霸等皆死賊知不赦堅守無降意朝廷患之日發中使促魏王繼岌東還繼岌以中軍精兵皆從任圜討李紹琛畱利州待之未得還李紹榮討趙在禮久無功趙太據邢州未下滄州軍亂小校王景戡討定之因自爲畱後河朔州縣告亂者相繼帝欲自征鄴都宰相樞密使皆言京師根本

車駕不可輕動帝曰諸將無可使者皆曰李嗣源最爲勳舊帝心忌嗣源曰吾惜嗣源欲畱宿衛皆曰它人無可者忠武節度使張全義亦言河朔多事久則患深宜令總管進討若倚紹榮輩未見成功之期李紹宏亦屢言之帝以內外所薦久乃許之甲寅命嗣源將親軍討鄴都董瑋將兵二萬屯綿州會任圜討李紹琛帝遣中使崔延琛至成都遇紹琛軍紿之曰吾奉詔召孟郎公若緩兵自當得蜀旣至成都勸孟知祥爲戰守備知祥浚濠樹柵遣馬步都指揮使李仁罕將四萬人驍銳指揮使李延厚將二千人討

紹琛延厚集其眾詢之曰有少壯勇銳欲立功求富貴者東袁疾畏懦厭行陳者西得選兵七百人以行是日任圜軍追及紹琛於漢州紹琛出兵逆戰招討掌書記張礪請伏精兵於後以羸兵誘之圜從之使董璋以東川羸兵先戰而卻紹琛輕圜書生又見其兵羸極力追之伏兵發大破之斬首數千級自是紹琛入漢州閉城不出三月丁巳朔李紹真奏克邢州擒趙太等庚申紹真引兵至鄴都營於城西北以太等徇於鄴都城下而殺之王戌李嗣源至鄴都營於城西南甲子嗣源下令軍中詰旦攻城是夜從

馬直軍士張破敗作亂帥眾大譟殺都將焚營舍詰旦亂兵逼中軍嗣源帥親軍拒戰不能敵亂兵益熾嗣源叱而問之曰爾曹欲何爲對曰將士從主上十年百戰以得天下今主上棄恩任威貝州戍卒思歸主上不赦云克城之後當盡阬魏博之軍近從馬直數卒誼競遽欲盡誅其眾我輩初無叛心但畏死耳今眾議欲與城中合勢擊退諸道之軍請主上帝河南令公帝河北爲軍民之主嗣源泣諭之不從嗣源曰爾不用吾言任爾所爲我自歸京師亂兵拔白刃環之曰此輩虎狼也不識尊卑令公去欲何之因擁

嗣源及李紹真等入城城中不受外兵皇甫暉邀擊張破敗斬之外兵皆潰趙在禮帥諸校迎拜嗣源泣謝曰將士輩負令公敢不惟命是聽嗣源詭說在禮曰凡舉大事須藉兵力今外兵流散無所歸我爲公出收之在禮乃聽嗣源紹真俱出城宿魏縣散兵稍有至者漢州無城塹樹木爲柵乙丑任圜進攻其柵縱火焚之李紹琛引兵出戰於金鴈橋兵敗與十餘騎犇綿竹追擒之孟知祥自至漢州犒軍與任圜董璋置酒高會引李紹琛檻車至座中知祥自酌大卮飲之謂曰公已擁節旄又有平蜀之功何患不富

貴而求入此檻車邪紹琛曰郭侍中佐命功第一兵
不血刃取兩川一旦無罪族誅如紹琛輩安保首領
以此不敢歸朝耳魏王繼岌旣獲紹琛乃引兵倍道
而東 李嗣源之爲亂兵所逼也李紹榮有眾萬人
營於城南嗣源遣牙將張虔釗高行周等七人相繼
召之欲與其誅亂者紹榮疑嗣源之詐畱使者閉壁
不應及嗣源入鄴都遂引兵去嗣源在魏縣眾不滿
百又無兵仗李紹眞所將鎮兵五千聞嗣源得出相
帥歸之由是嗣源兵稍振嗣源泣謂諸將曰吾明日
當歸藩上章待罪聽主上所裁李紹眞及中門使安

重誨曰此策非宜公爲元帥不幸爲凶人所劫李紹
榮不戰而退歸朝必以公藉口公若歸藩則爲據地
邀君適足以實讒慝之言耳不若星行詣闕面見天
子庶可自明嗣源曰善丁卯自魏縣南趣相州遇馬
坊使康福得馬數千匹始能成軍福蔚州人也平
盧節度使符習將本軍攻鄴都聞李嗣源軍潰引兵
歸至淄州監軍使楊希望遣兵逆擊之習懼復引兵
而西青州指揮使王公儼攻希望殺之因據其城時
近侍爲諸道監軍者皆恃恩與節度使爭權及鄴都
軍變所在多殺之安義監軍楊繼源謀殺節度使孔

勅勅先誘而殺之武寧監軍以李紹真從李嗣源謀
殺其元從據城拒之權知畱後渚于晏帥諸將先殺
之晏登州人也 戊辰以軍食不足勅河南尹豫借
夏秋稅民不聊生 忠武節度使尙書令齊王張全
義聞李嗣源入鄴都憂懼不食辛未卒於洛陽 租
庸使以倉儲不足頗朘刻軍糧軍士流言益甚宰相
懼帥百官上表言今租庸已竭內庫有餘諸軍室家
不能相保儻不賑救懼有離心俟過凶年其財復集
上卽欲從之劉后曰吾夫婦君臨萬國雖藉武功亦
由天命命旣在天人如我何宰相又於便殿論之后

屬耳於屏風後須臾出糴具及三銀盆皇幼子三人
於外曰人言宮中蓄積多四方貢獻隨以給賜所餘
止此耳請鬻以贍軍宰相惶懼而退李紹榮自鄴
都退保衛州奏李嗣源已叛與賊合嗣源遣使上章
自理一日數輩嗣源長子從審爲金槍指揮使帝謂
從審曰吾深知爾父忠厚爾往諭朕意勿使自疑從
審至衛州紹榮囚欲殺之從審曰公等旣不亮吾父
吾亦不能至父所請復還宿衛乃釋之帝憐從審賜
名繼璟待之如子是後嗣源所奏皆爲紹榮所遏不
得通嗣源由是疑懼石敬瑭曰夫事成於果決而敗

於猶豫安有上將與叛卒入賊城而它日得保無恙乎大梁天下之要會也願假三百騎先往取之若幸而得之公宜引大軍亟進如此始可自全突騎都指揮使康義誠曰主上無道軍民怨怒公從眾則生守節必死嗣源乃令安重誨移檄會兵義誠代北胡人也時齊州防禦使李紹虔泰寧節度使李紹欽貝州刺史李紹英屯瓦橋北京右廂馬軍都指揮使安審通屯奉化軍嗣源皆遣使召之紹英瑕丘人本姓房名知溫審通金全之姪也嗣源家在真定虞候將王建立先殺其監軍由是獲全建立遼州人也李從珂

自橫水將所部兵由孟縣趣鎮州與王建立軍合倍道從嗣源嗣源以李紹榮在衛州謀自白皐濟河分三百騎使石敬瑭將之前驅李從珂爲殿於是軍勢大盛嗣源從子從璋自鎮州引軍而南過邢州邢人奉爲畱後 癸酉詔懷遠指揮使白從暉將騎兵扼河陽橋帝乃出金帛給賜諸軍樞密宣徽使及供奉內使景進等皆獻金帛以助給賜軍士負物而詬曰吾妻子已殍死得此何爲甲戌李紹榮自衛州至洛陽帝如鵲店勞之紹榮曰鄴都亂兵已遣其黨翟建白據博州欲濟河襲鄆汴願陛下幸關東招撫之帝

從之 乙亥帝發洛陽丁丑次汜水戊寅遣李紹榮
將騎兵循河而東李嗣源親黨從帝者多亡去或勸
李繼璟宜早自脫繼璟終無行意帝屢遣繼璟詣嗣
源繼璟固辭願死於帝前以明赤誠帝聞嗣源在黎
陽彊遣繼璟渡河召之道遇李紹榮紹榮殺之 庚
辰帝發汜水辛巳李嗣源至白皐遇山東上供絹數
船取以賞軍安重誨從者爭舟行營馬步使陶玘斬
以徇由是軍中肅然玘許州人也嗣源濟河至滑州
遣人招符習習與嗣源會於胙城安審通亦引兵來
會知汴州孔循遣使奉表西迎帝亦遣使北輸密款

於嗣源曰先至者得之先是帝遣騎將滿城西方鄴
守汴州石敬瑭使裨將李瓊以勁兵突入封丘門敬
瑭踵其後自西門入遂據其城西方鄴請降敬瑭使
人趣嗣源壬午嗣源入大梁是日帝至滎澤東命龍
驤指揮使姚彥溫將三千騎爲前軍曰汝曹汴人也
吾入汝境不欲使它軍前驅恐擾汝室家厚賜而遣
之彥溫卽以其眾叛歸嗣源謂嗣源曰京師危迫主
上爲元行欽所惑事勢已離不可復事矣嗣源曰汝
自不忠何言之悖也卽奪其兵指揮使潘環守王村
寨有芻粟數萬帝遣騎視之環亦犇大梁帝至萬勝

鎮聞嗣源已據大梁諸軍離叛神色沮喪登高歎曰
吾不濟矣卽命旋師是夜復至汜水帝之出關也扈
從兵二萬五千及還已失萬餘人乃畱秦州都指揮
使張唐以步騎三千守關癸未帝還過罌子谷道狹
每遇衛士執兵仗者輒以善言撫之曰適報魏王又
進西川金銀五十萬到京當盡給爾曹對曰陛下賜
已晚矣人亦不感聖恩帝流涕而已又索袍帶賜從
官內庫使張容哥稱頒給已盡衛士叱容哥曰致吾
君失社稷皆此閹豎輩也抽刀逐之或救之獲免容
哥謂同類曰皇后吝財致此今乃歸咎於吾輩事若

不測吾輩萬段吾不忍待也因赴河死甲申帝至石橋西置酒悲涕謂李紹榮等諸將曰卿輩事吾以來急難富貴靡不同之今致吾至此皆無一策以相救乎諸將百餘人皆截髮置地誓以死報因相與號泣是日晚入洛城李嗣源命石敬瑭將前軍趣汜水收撫散兵嗣源繼之李紹虔李紹英引兵來會丙戌宰相樞密使共奏魏王西軍將至車駕宜且控汜水收撫散兵以俟之帝從之自出上東門閱騎兵戒以詰旦東行夏四月丁亥朔嚴辦將發騎兵陳於宣仁門外步兵陳於五鳳門外從馬直指揮使郭從謙不

知睦王存乂已死欲奉之以作亂帥所部兵自營中
露刃大呼與黃甲兩軍攻興教門帝方食聞變帥諸
王及近衛騎兵擊之逐亂兵出門時蕃漢馬步使朱
守殷將騎兵在外帝遣中使急召之欲與同擊賊守
殷不至引兵憩於北邙茂林之下亂兵焚興教門緣
城而入近臣宿將皆釋甲潛遁獨散員都指揮使李
彥卿及宿衛軍校何福進王全斌等十餘人力戰俄
而帝爲流矢所中鷹坊人善友扶帝自門樓下至絳
霄殿廡下抽矢渴懣求水皇后不自省視遣宦者進
酪須臾帝殂李彥卿等慟哭而去左右皆散善友斂

廡下樂器覆帝尸而焚之彥卿存審之子福進全斌
皆太原人也劉后囊金寶繫馬鞍與申王存渥及李
紹榮引七百騎焚嘉慶殿自師子門出走通王存確
雅王存紀犇南山宮人多逃散朱守殷入宮選宮人
三十餘人各令自取樂器珍玩內於其家於是諸軍
大掠都城是日李嗣源至罌子谷聞之慟哭謂諸將
曰主上素得士心正爲羣小蔽惑致此今吾將安歸
乎戊子朱守殷遣使馳白嗣源以京城大亂諸軍焚
掠不已願亟來救之己丑嗣源入洛陽止於私第禁
焚掠拾莊宗骨於灰燼之中而殯之嗣源之入鄴都

也前直指揮使平遙侯益脫身歸洛陽莊宗撫之流涕至是益自縛請罪嗣源曰爾爲臣盡節又何罪也使復其職嗣源謂朱守殷曰公善巡徼以待魏王淑妃德妃在宮供給尤宜豐備吾俟山陵畢社稷有奉則歸藩爲國家扞禦北方耳是日豆盧革帥百官上牋勸進嗣源面諭之曰吾奉詔討賊不幸部曲叛散欲入朝自訴又爲紹榮所隔披猖至此吾本無它心諸君遽爾見推殊非相悉願勿言也革等固請嗣源不許李紹榮欲犇河中就永王存霸從兵稍散庚寅至平陸止餘數騎爲人所執折足送洛陽存霸亦帥

眾千人棄鎮犇晉陽 辛卯魏王繼岌至興平聞洛

陽亂復引兵而西謀保據鳳翔 向延嗣至鳳翔以

莊宗之命誅李紹琛 初莊宗命呂鄭二內養在晉

陽一監兵一監倉庫自畱守張憲以下皆承應不暇

及鄴都有變又命汾州刺史李彥超爲北都巡檢彥

超彥卿之兄也莊宗旣歿推官河間張昭遠勸張憲

奉表勸進憲曰吾一書生自布衣至服金紫皆出先

帝之恩豈可偷生而不自愧乎昭遠泣曰此古人所

行公能行之忠義不朽矣有李存沼者莊宗之近屬

自洛陽犇晉陽矯傳莊宗之命陰與二內養謀殺憲

及彥超據晉陽拒守彥超知之密告憲欲先圖之憲曰僕受先帝厚恩不忍爲此徇義而不免於禍乃天也彥超謀未決壬辰夜軍士共殺二內養及存沼於牙城因大掠達旦憲聞變出犇忻州會嗣源移書至彥超號令士卒城中始安遂權知太原軍府百官上牋啟嗣源監國嗣源乃許之甲午入居興聖宮始受百官班見下令稱教百官稱之曰殿下莊宗後宮存者猶千餘人宣徽使選其美小者數百獻於監國監國曰奚用此爲對曰宮中職掌不可闕也監國曰宮中職掌宜諳故事此輩安知之乃悉用老舊之人

補之其少年者皆出歸其親戚無親戚者任其所適蜀中所送宮人亦準此 監國令所在訪求諸王通王存確雅王存紀匿民間或密告樞密使安重誨與李紹真謀曰今殿下旣監國典喪諸王宜早爲之所以壹人心殿下性慈不可以聞乃密遣人就田舍殺之後月餘監國乃聞之切責重誨傷惜久之劉皇后與申王存渥奔晉陽在道與存渥私通存渥至晉陽李彥超不納走至風谷爲其下所殺明日承王存霸亦至晉陽從兵逃散俱盡存霸削髮僧服謁李彥超願爲山僧幸垂庇護軍士爭欲殺之彥超曰六相公

來當奏取進止軍士不聽殺之於府門之碑下劉皇后爲尼於晉陽監國使人就殺之薛王存禮及莊宗幼子繼嵩繼漳繼蟾繼堯遭亂皆不知其所終惟邕王存美以病風偏枯得免居於晉陽 戊戌李紹榮至洛陽監國責之曰吾何負於爾而殺吾兒紹榮瞋目直視曰先帝何負於爾遂斬之復其姓名曰元行欽 監國恐征蜀軍還爲變以石敬瑭爲陝州畱後己亥以李從珂爲河中畱後 監國下教數租庸使孔謙奸佞侵刻窮困軍民之罪而斬之凡謙所立苛斂之法皆罷之因廢租庸使及內甸司依舊爲鹽鐵

戶部度支三司委宰相一人專判又罷諸道監軍使以莊宗由宦官亡國命諸道盡殺之魏王繼岌自

興平退至武功宦者李從襲曰禍福未可知退不如進請王亟東行以救內難繼岌從之還至渭水權西都畱守張錢已斷浮梁循水浮渡是日至渭南腹心呂知柔等皆已竄匿從襲謂繼岌曰時事已去王宜自圖繼岌徘徊流涕乃自伏於牀命僕夫李環縊殺之任圜代將其眾而東監國命石敬瑭慰撫之軍士皆無異言先是監國命所親李冲爲華州都監應接西師冲擅逼華州節度使史彥鎔入朝同州節度使

李存敬過華州冲殺之并屠其家又殺西川行營都
監李從襲彥鎔泣訴於安重誨重誨遣彥鎔還鎮召
冲歸朝自監國入洛內外機事皆決於李紹真紹真
擅收威勝節度使李紹欽太子少保李紹冲下獄欲
殺之安重誨謂紹真曰溫段罪惡皆在梁朝今殿下
新平內難冀安萬國豈專爲公報仇邪紹真由是稍
沮 辛丑監國敎李紹冲紹欽復姓名爲溫韜段凝
並放歸田里 壬寅以孔循爲樞密使 有司議卽
位禮李紹真孔循以爲唐運已盡宜自建國號監國
問左右何謂國號對曰先帝賜姓於唐爲唐復讐繼

昭宗後故稱唐今梁朝之人不欲殿下稱唐耳監國
曰吾年十三事獻祖獻祖以吾宗屬視吾猶子又事
武皇垂三十年先帝垂二十年經綸攻戰未嘗不預
武皇之基業則吾之基業也先帝之天下則吾之天
下也安有同家而異國乎令執政更議吏部尙書李
琪曰若改國號則先帝遂爲路人梓宮安所託乎不
惟殿下不忘三世舊君吾曹爲人臣者能自安乎前
代以旁支入繼多矣宜用嗣子柩前卽位之禮眾從
之丙午監國自興聖宮赴西宮服斬衰於柩前卽皇
帝位百官縞素旣而御袞冕受冊百官吉服稱賀

有司劾奏太原尹張憲委城之罪庚戌賜憲死任
圜將征蜀兵二萬六千人至洛陽明宗慰撫之各令
退營甲寅大赦改元量畱後宮百人宦官三十人
教坊百人鷹坊二十人御廚五十人自餘任從所適
諸司使務有名無實者皆廢之分遣諸軍就食近畿
以省饋運除夏秋稅省耗節度防禦等使正至端午
降誕四節聽貢奉毋得斂百姓刺史以下不得貢奉
選人先遭塗毀文書者令三銓止除詐僞餘復舊規
宦官數百人竄匿山林或落髮爲僧至晉陽者七
十餘人五月詔北都指揮使李從溫悉誅之從溫帝

之姪也 丙子聽郭崇韜歸葬復朱友謙官爵兩家
貨財田宅前籍沒者皆歸之 秋七月丙子葬光聖
神閔孝皇帝於雍陵廟號莊宗
二年春二月丙申以從馬直指揮使郭從謙爲景州
刺史旣至遣使族誅之

張溥曰同光四年之變始於魏王繼岌之殺郭
崇韜成於皇甫暉之劫趙在禮終於郭從謙之
弑莊宗然崇韜之死不特非帝心卽魏王亦弗
願也馬彥珪說劉后作教李從襲等環而泣請
魏王不得已應之殺一大將在須臾間刑無勅

書罪無主名升階搥首蓋直戲耳皇甫暉夜博
不勝因訛言造亂殺傷仁最奉趙在禮爲帥豈
真欲反哉適以戲激也郭從謙帝所幸愛厚於
郭崇韜李存乂帝以是戲之懼而謀變尋常諧
謔之言卽帝亦忘之不意露刃注矢出其間也
魏王擅殺崇韜其罪當問卽不問當坐彥珪從
襲帝不一省反聽景進言誅李存乂族朱友謙
以甚其過則天下真以爲帝殺崇韜矣趙在禮
爲亂兵所逼擾攘至鄴都先逆擊之後慰撫之
皆可無大變無如史彥瓊之開門揖盜又絕彼

自新也鄴都招撫帝旣命李紹榮又遣李嗣源
往討一方小警兩將並出理亂絲而勞之曷以
靖諸張破敗作亂嗣源幾踵在禮幸而得脫冀
歸朝廷復爲紹榮阻遏懼無以明石敬瑭乃說
取大梁帝聞之以爲嗣源果反也輕離宮闕回
翔汜水而郭從謙彎弓起矣從來國家破亡非
強寇外作卽釁叛內生聚患肘腋之間爭衡矢
石之際或相持累年或潰裂一旦禍皆有原莊
宗無是也孺子專殺民訛驟興擄蒲之卒夜驚
幕府首鼠之將朝沸京師大將忽疑兩端天子

適履境外優笑發難流矢爲殃嗣源無心乎篡
而迹涉逐君莊宗可以不亡而身先被弑變出
偶然勢成莫反雖有智勇已不及施是繇帝立
漢高馬上之功而不割元帝洞簫之愛慕唐宗
用兵之長而未絕玄皇幃房之溺遂至顛沛俄
頃與昏亂同轍哀哉

通鑑紀事本末卷一百二十九

